



La Societât Filologjiche e je daûr a burî fûr cinc libruts cun 20 unitâts didatichis pai insegnants di chenti par madressi la lenghe dentri de ativitât scuclastiche .

» DI GIUSEPPE GORZA

Imprescj pe scueele in furlan

Tal meti in vore lis leçs pal insegnament de marilenghe, dispès si cjatîs denant a la mancjançe di materiâi didatics. I progjets a son, ma a vegnin fats e a restin dentri di une scuele, di un istitût comprensîf, o, al miôr, intune rêt di scuclis.

Par meti a disposizion de scuele di chenti imprescj didatics in linie cu lis liniis educativis dal di di vuê, la Filologjiche e je daûr a meti in vore il progjet "Marilenghe te scuele", sostignût de Regjon cul bant pai progjets speciâi pe scuele dal 2014, che al intint realizâ unitâts dida-

tichis par ogni classe de scuele primarie che a podaran jessi dopradis di bande di ducj i docents inte suaze dal insegnament dal furlan a scuele.

FATS A PUESTE PAI FRUTS

Par ogni classe de scuele primarie a son stadis sielzudis 4 unitâts didatichis par un totâl duncje di 20 unitâts, ognidune cuntun percors coordinât di aprediment che al corrispuint a chel che al pues jessi fat: no je duncje une liste di robis di fâ cui fruts, e nancje une racuelte di contis de tradizion e mancun

un eserciziari di grafie e gramatiche.

Ognidun dai cinc fassicui che a saran burîts fûr te suaze dal progjet, un par ogni classe des primariis, al disvilupe percors didatics fats a pueste pai frutins di ogni singule classe: ju argomentis a son metûts dongje considerant ce che al ven fat te programazion reâl de scuele, seont lis modalitâts e lis strategiis educativis plui inovativis.

Lis propuestis a son diversis cuntun argument par ogni unitât, cun temis pardabon difarents: juste par segnalâ cualchi argument, tes unitâts si fevele di alimentazion, musiche, tematiche, tecnologie, gjeografie, storie, siencis e vie indenant. Cun di plui, la sielte di doprà la metodologie CLIL e mire a ricreâ un ambient di insegnament in stât di meti insiem, in maniere funzionâl, la marilenghe dentri de ativitât scuclastiche.

Cheste propueste didatiche, che e sarâ pronte par Dicembar, e intint prudelâ e dâ visibilitât a percors e materiâi didatics elaborâts dai docents di lenghe furlane di chenti. Par chest la Filologjiche e à metût adun un grop di ricercje e sperimentazion che al cjape dentri mestris de nestre scuele tra i plui preparâts e competents e che a vegnin di dut il Friûl (di Codroip, Cormons, Cividât, Manià, Vivâr, Tavagnà, Tressen).



ilfriuli@ilfriuli.it

RADIO ONDE FURLANE

Dibatit a Trep Grant su paisaç e economie

Radio Onde Furlane e promov un dibatit su paisaç, aghis, eletrodots e economie solidarie. L'apontament al è ai 5 di Setembar, tal prât de famee Odorico-Bellina tal biel borc di Zeanut di Trep Grant, di 7 sot sere indenant. La serade si clame 'Friûl Ben Comun' e, in plui di un moment di riflessione e e vûl jessi ancje une ocasion di fieste.

Il program al ten dongje il ben e il bon dal Friûl, cun prodots 'a km zero', la musiche dal vîf dai Lajpnessless, lis provocazioni creativis dai Cjastrons e une schirie di intervents di rapresentants di comitâts e istituzions. Il diretôr di Onde Furlane, **Mauro Missana**, al fevelarâ di energie, di paisaç e di eletrodots cun **Aldevis Tibaldi** dal Comitât pe vite dal Friûl rurâl, di aghe tant che ben comun e risorse economiche cun **Franceschino Barazzutti** dal Comitât pe difese des aghis dal bacin di mont dal Tiliment, e di economie solidarie e sostignibile cun **Massimo Moretuzzo**, sindic di Merêt di Tombe che al presentarâ ancje il progjet Pan e farine dal Friul di Mieç.

SCOLTADIS DI DRIUS

Feminis fuartes

Si use a di che les feminis e son el "sesso debole".

Provait, di gnot, a tirâ les cuviartis de vuestre bande !



Euronews informa

Cantîr di Sante Catarine, sistemâts ducj i doi i sotpàs ferroviaris

In curt la consegne des gnovis cjasis

Cantîr di Sante Catarine: ducj i doi i sotpàs ferroviaris a son stâts metûts sot dai binaris. Daspò de sburte dal prin monolit (bande Cjampfuarmit), a son stadis puartadis insom lis stessis operazions di moviment dal secont scatolâr di ciment armât (bande Pasian di Prât). A son manovris une vore dificilis che a àn scugnût vè intervents preliminârs par garantî la massime sigurece al trafic ferroviari che no si è mai fermât. Sot dai binaris di fat al è stât metût un sisteme di ferme clamât "Ponte Verona" che al à permetût ai trens di mantignî la velocitât fin ai 80 km oraris. Strutture che e je stade gjavade in ducj i doi i ponts dulâ che a insistevin lis sburtadis cu la risistemazion de pedrade dai binaris come che e jere prime. Lis fasis di lavôr, che a son duradis un mê e mieç, a

son stadis tignudis sot control dai tecnicos di Ferrovie dello Stato che a àn lavorât insiem cu lis maestrançis dal cantîr.

Prossime fase dal cantîr la consegne des gnovis cjasis come misure compensative pai proprietaris dai imobii di vie Basilian che a varan di jessi butâts jù stant che a son framieç de rampe di ingrés (bande Udin) de prossime rotatorie che e sarâ a cirche 6,5 metris sot de linie de ferrovie.

"Lis cjasis a son prontis za di timp - al spiege il vicepresident cun deleghe ae viabilitât Franco Mattiussi - ma la firme dal contrat si podarâ fâ dome dopo vè sierât lis praticichis burocratichis un pôc dificilis par chest intervent. O spein di sierâ l'iter tes prossimis setemanis". Consegnadis lis cjasis, si butaran jù lis abitazions che a interferissin cul cantîr.



Duncje a varan di jessi fats i intervents pe eliminazion dal passaç a nivel e la atuazion de gnove strutture di viabilitât. Par chest si fasaran riunions tra i tecnicos de Provincie e chei di Rfi par definî i particolârs dal intervent che, par esigjencis di sigurece, a podarissin subi deviazions o interruzions al trafic stradâl par cualchi zornade.

Il passaç a nivel, grazie al intervent de Pro-

vincie di Udin, al vignarâ eliminât e cambiât cuntune gnove strutture di viabilitât che di Sante Catarine al corarâ in bande de linie ferroviarie e po, midiant une taronde "in trinçee", si tornarâ a colegâ ae statâl Pontebane. L'intervent in dut al previôt un investiment di 5 milions 164 mil e 569 euro, di chei 4 milions 131 mil e 655 de Regjon e 1 milion 32 mil e 913 des Ferovis.